

Nunat Avannarliit Killiit Siunnersuisoqatigiiffiata aalajangersagaa nr. 2/2009 Inatsisartunit taparserneqarnissaa pillugu Inatsisartut aalajangiiffigisassaattut siunnersuut, aalajangersagaq ima oqaasertaqarpoq:

Nunani avannarlerni killerni utoqqarnut tunngasut pillugit suleqatigiinneq paasissutissanillu ingerlatitseqqittarneq annertusaqqullugit Islandimi, Savalimmiuni Kalaallillu Nunaanni naalakkersuisut Nunat Avannarliit Killiit Siunnersuisoqatigiiffiannit kaammattorneqarnerat

(Aallartitat siulittaasuannit Josef Motzfeldtimit saqqummiunneqartoq)

pillugu

Ilaqutariinnermut Ataatsimiititaliap

ISUMALIUTISSIISSUTAA

Aalajangiiffigisassatut siunnersuutip aappassaaneerpeqarnerani saqqummiunneqartoq

Ilaqutariinnermut Ataatsimiititaliap suliarinninnermini ukuningga inuttaqarpoq:

Inatsisartunut ilaasortaq Debora Kleist, Inuit Ataqatigiit
Inatsisartunut ilaasortaq Jane Petersen, Inuit Ataqatigiit
Inatsisartunut ilaasortaq Astrid Fleischer Rex, Demokraatit
Inatsisartunut ilaasortaq Ruth Heilmann, Siumut
Inatsisartunut ilaasortaq Knud Kristiansen, Atassut

Ulloq 26. oktober 2010-mi siunnersuutip siullermeerneqarnerata kingorna sukumiinerusumik suliarineqartussanngorlugu Ilaqutariinnermut Ataatsimiititaliamut innersuussutigineqarpoq.

Siunnersuutip imarisaa siunertaalu

Nunani Avannarlerni Killerni utoqqarnut tunngasut pillugit suleqatigiinneq paasissutissanillu avitseqatigiittarnerup annertusarneqarnissaanut aalajangersakkami kaammatusoqarpoq. Nunani Avannarlerni Killerni utoqqaat inuusuttunut sanilliullutik amerliartornerannik utoqqaallu najugaqarfiinik paaqqutarinninnermilu sulisussanik amigaateqarneq siunnersuuteqarnermut tunngaviupput. Nunani Avannarlerni Killerni suleqatigiinnerup paasissutissanillu avitseqati-

giinnerup annertusarneqarneri utoqqarnut tunngasuni unammilligassat taaneqartut siumut isigisumik aaqqiissuteqarfiginissaannut peqataasinnaasut siunnersuuteqartup ilimagaa.

Inatsisartut siunnersuummik siullermeerinerat

Siunnersuutip siullermeerneqarnerani Nunat Avannarliit Killiit Siunnersuisoqatigiiffiata aalajangersagaa nr. 2/2009 partiinit tamanit Naalakkersuisunillu tapersersorluarneqarpoq.

Ataatsimiititaliap siunnersuummik suliarinninnera

Utoqqarnut tunngasuni Nunat Avannarliit killiit suleqatigiinnerata annertusarneqarnissaa ataatsimiititaliamit iluarisimaarneqarpoq. Nunat Avannarliit Killiit Siunnersuisoqatigiivisa aalajangersagaanni eqqarsaatersuutit siunertarisallu ataatsimiititaliap tamakkiisumik tapersersorpai. Utoqqarnut tunngasuni Nunat Avannarliit killiit suleqatigiissinnaanerata imminnullu isummorsinnaanerata tapersersornartorujussuuvoq. Ilaqutariinnermut Ataatsimiititaliap nunatsinni pissutsinik ilisimasaqarnermigut paasisimasaqarnermigullu isumaliutersuutit pissutisillu siunnersuuteqarnermut aallaavigineqartut ilisarinnavaa.

Sammineqartut “utoqqarnik paaqqutarinnineq” aammalu “ utoqqaat inuunerminni pitsaanerusumik atugaqarnissaat” siunissami ukiuni aggersuni naalakkersuinikkut isumaliutigisassanut suliniutissanullu arlalinnut toqqammavigineqarnissaat Ilaqutariinnermut Ataatsimiititaliap eqqumaffigaa, taamaattumik Nunat Avannarliit Killiit akornanni suleqatigiinnerup annertusarneqarnissaa paasissutissanillu avitseqatigiittarnerup nukittorsarneqarnissaa assut tapersersornarpoq aammalu utoqqarnut tunngasut aallunneqaleraluttuinnarnerannut naapertutissalluni.

Suliniutit pilersaarutillu “utoqqarniit utoqqarnut” nalitoorpassuit ukiunilu kingullerni amerliartuinnartut aammalu utoqqaat siusinnerusumut sanilliullugu annertunerusumik tapersersoqatigiillutillu ikioqatigiinnerunissaannik tunngaviusumik isumassarsiaasut Siunnersuummik matuminnga suliarinninnermut atatillugu Ilaqutariinnermut Ataatsimiititaliap erseqqissaatiginngitsoorusunngilai.

Utoqqaat amerliartorput, kisianni aamma akuuneruartuinnarput, ilisimasaqarnerulerlutik imminnullu tunngasunik eqqummaarinnerulerlutik. Suleqatigiinneq annertunerusoq utoqqaat akuuneruleraluttuinnarnerat utoqqarnullu tunngasuni ineriartornermut naatsorsuutigisanut qularisassaangitsumik naapertuulluinnartuussaaq.

Siunnersuut, tassunga ilanngullugit suliasaqarfimmi suliniutit aalajangersimasumik saqqummiunneqartut Naalakkersuisunit Inatsisartunilu politikkikkut partiinit tapersersorneqarsinnaammata ataatsimiititaliap nuannaarutigalugu oqaatigissavaa.

Utoqqarnik utoqqarnullu tunngasuni illuatungeriinnik attuumassuteqartunik allanik Naalakkersuisut suleqateqarniarnerat naleqquttuullunilu tapersersornartoq Ilaqutariinnermut Ataatsimiititaliap isumaqarpoq.

Siunnersuut aningaasatigut kinguneqarnaviangitsoq Naalakkersuisut nalileraat paasissutissanillu ingerlatitseqqittarneq aningaasaliissutaareersut iluini matussuserniarneqartoq Ilaqutariinnermut Ataatsimiititaliap maluginiarpaa.

Ungasinnerusiq isigalugu Nunat Avannarliit Killerni utoqqarnut tunngasut pillugit isumasioqatigiinnermik ingerlatsisoqartariaqarnera pillugu siullermeerinermi siunnersuummik saq-qummiussisoqarnera Ilaqutariinnermut Ataatsimiititaliamit tapersersorneqarpoq, taamaalilluni illuatungeriit susassaqtut utoqqarnut tunngasuni suleqatigiiffimmik ataavartumik pilersitsisinaaqqullugit, taamaalillunilu utoqqaat pillugit suleqatigiinnermut utoqqaallu suleqatigiinnerannut aammalu tassunga atatillugu ilisimasanik misilittakkanillu avitseqatigiinnermut attaveqatigiinnerit aalajangersimasut taakku nukittorsaanissaat qulakkeerneqarsinnaaqqullugu.

Nunani Avannarlerni Killerni illuatungeriinnut attuumassuteqartunut piffissaq sioqqullugu tusarniaanermik ingerlatsisoqarsimagaluarpat Nunat Avannarliit killiit Siunnersuisoqatigiiffiannit aalajangersakkamut saqqummiunneqartumut nukittoqutaasimassagaluarpoq. Matumani assersuutigalugu utoqqaat kattuffiitut oqartussanullu ulluinnarni utoqqarnut tunngasunik suliaqartartunut tusarniaasoqarsimassagaluarluni. Nunat Avannarliit Killiit Siunnersuisoqatigiivisa aalajangersagaannik pilersitsiartuaarnerup sukumiinerusumik misissorneqarnissaa Nunat Avannarliit Killiit Siunnersuisoqatigiiffianni nunatta aallartitaannut kaammattuutigiinnerneqarsinnaavoq. Aammattaaq Ilaqutariinnermut Ataatsimiititaliap kaammattuummumut tamatumunnga ilassutitut oqaatigissavaa, siunnersuummi matumani oqaatigineqartut sammisat pingaarutillit suliarinissaannut ullunik 14-inik ikinnerusunik ataatsimiititaliaq piffissalernerneqarnera naammaginangilluinnarmat.

Nunani Avannarlerni Killerni utoqqarnut tunngasuni suleqatigiinnerup annertusarneqarneratigut suleqatinik susassaqtunik allanik suleqateqarnissamut mattussisoqanngimmat Ilaqutariinnermut Ataatsimiititaliamit naggataatigut oqaatigineqassaaq.

Inassuteqaat

Taama oqaaseqarluni aalajangiiffigisassatut siunnersuut ilusimisut iluseqartoq akueri-neqassasoq ataatsimiititaliap isumaqatigiittup inassutigaa.

Tamanna tunngavigalugu aalajangiiffigisassatut siunnersuut Ilaqutariinnermut Ataatsimiititaliap inaarutaasumik aappassaaniigassanngortippaa.

Debora Kleist
Siulittaasoq

Jane Petersen

Astrid Fleischer Rex

Ruth Heilmann

Knud Kristiansen